

大唐開元禮



大唐開元禮



大唐開元禮卷第九十八

嘉禮

皇后正至受羣臣朝賀

皇后正至受外命婦朝賀

并會

皇后正至受羣臣朝賀

前一日尙寢帥其屬設御幄座如外命婦朝賀之儀
守宮設羣官次於宮城門外如常儀其日未明一
刻諸衛各勒所部屯門列仗及陳布於肅章門外奉
禮設文武羣官諸親蕃客等位於宮城門外如朝堂
之式典儀設文武羣官位於肅章門外文東武西俱

重行北向相對爲首諸親位於文武五品之下朝集

使蕃客等分方位次如常設典儀贊者位於羣官東

北差退西面北上又設內給事位於羣官之北南向

若與外命婦同時朝典儀於肅章門外設羣官服位文武羣官依時刻集於門

外俱就次各服其服若與上臺同日朝賀則上臺禮畢羣官仍朝服典謁引從納義

門西行尚儀奏請中嚴六佾以下各服其服俱詣

內閣奉迎典儀帥贊者先入就位典謁引文武羣官

入就位尚儀奏外辦皇后首飾褱衣以出卽御位南

向坐侍衛警蹕及設琮璽於御座竝如常儀內謁者

監引內給事出就南面典儀曰再拜贊者承傳文武

羣官等俱再拜典儀引爲首者一人進內給事前北面跪賀稱元正首祚景福惟新伏維殿下與時同休
冬至云天正長至伏維殿下如日之升賀訖俛伏興典謁引退復位羣官等皆再拜內謁者監引內給事人依式奏聞內給事承令出內謁者監引內給事復南面立稱令旨羣官等皆再拜內給事宣令云履新冬至云履長之慶與公等同之羣官等又再拜內謁者監引內給事入典謁引羣官等出尙儀前奏禮畢皇后降座以入侍衛警蹕如常儀

皇后正至受外命婦朝賀

并會

前二日本司宣攝內外各供其職 前一日守宮設

外命婦次如常儀尙寢帥其屬設御幄於皇后正殿
北壁南向又設命婦爲首者脫舄席於西階前近西
東向如式司樂展宮懸之樂於殿庭設磨於殿上西
階之西東向內僕進重翟以下於肅章門之外道東
西面北上司贊設外命婦版位於殿庭大長公主以
下在東太夫人以下在西諸親婦女位於外命婦之
下皇宗親在東
異姓親在西俱重行北向相對爲首內謁者設外
命婦等位於肅章門外大長公主以下於道東太夫
人以下於道西俱重行相向北上命婦有夫從夫之

爵無夫從子之爵設司贊位於東階東南西向掌贊
二人位於司贊之南差退俱西向受朝 日依時刻
諸衛勒所部屯門列仗及陳布於肅章門外如常儀
外命婦等依時刻集列宮門外至下車所道西東向
以車爲次北上車次定外命婦等皆降車內典引引
之次各服其服尙儀奏請中嚴宮官侍衛者皆朝服
司寶奉琮寶依式俱詣內閣奉迎司樂帥女工人入
就位典樂升就舉麾位司贊帥掌贊先入就位內典
引引外命婦俱詣肅章門外位尙儀奏外辦皇后首
飾褱衣以出警蹕侍衛如常儀皇后出自西房典樂

舉麾奏正和之樂卽御座南向坐司寶奉琮寶置於

御座如常偃麾樂止

凡樂皆典樂舉麾工鼓祝而後作偃麾戛鼓而後止

司賓

承引外命婦以次入就位爲首者初入門舒和之樂作至位樂止命婦等立定司贊曰再拜掌贊承傳外命婦等皆再拜司賓引爲首者一人詣西階爲首者初行樂作至階樂止爲首者脫舄升進當御座前北面跪賀稱妾姓等言元正首祚景福惟新伏維殿下與時同休

冬至云天正長至伏維殿下如日之升

賀訖起司賓引爲首

者自西階降納舄樂作復位立定樂止司贊曰再拜

掌贊承傳命婦等皆再拜司言前承令降自西階詣

命婦西北東面稱令旨外命婦等皆再拜宣令云履

新

冬至云履長

之慶與夫人等同之司贊曰再拜掌贊承

傳外命婦等皆再拜司賓以次引出爲首者初行樂
作出閣樂止內典引承引以出尙儀前奏禮畢還侍
位皇后降座樂作入自東房侍衛警蹕如來儀樂止
女工人退

會

朝訖尙寢帥其屬鋪外命婦等之座於殿上大長公
主以下於御座東南重行西向太夫人以下於御座
西南重行東向設不升殿者座席於東西廊下皆如

上儀又量設脫屣席於東西階下尙食設壽尊於殿
上東序之端西向有坫加爵一於尊下設升殿者酒
尊於東西廊下近北設廊下者酒尊各於其座之南
皆有坫幕俱障以帷設訖司樂帥諸樂人就位內典
引引外命婦俱詣肅章門外位尙儀奏外辦皇后首
飾褱衣以出警蹕侍衛如常儀皇后出自西房典樂
舉麾正和之樂作卽御座南向坐司寶奉琮寶置於
御座前如常儀偃麾樂止

凡樂皆典樂舉麾工鼓祝而後作偃麾戛鼓而後止

司賓承引外命婦以次入就位爲首者初入門樂作
至位樂止外命婦立定

若朝會別日贊拜如朝禮

司言前承令降

詣命婦西北東向稱令旨夫人等升席坐司贊曰再
拜掌贊承傳外命婦等皆再拜訖司賓引外命婦應
升殿者詣東西階樂作爲首者至階樂止俱就席脫
舄於階下以升司賓引爲首者一人升階近東西面
立以下各就席後立司賓引不升殿者詣東西廊下
席後立上下立定司賓引爲首者詣酒尊所北面立
尙食酌酒一爵以授爲首者司賓引爲首者至御座
前北面授尙食尙食受爵跪進置御座前司賓引爲
首者退北面跪奏稱妾姓等言元正首祚
冬至賀云
天正長至
妾等不勝大慶謹上千萬歲壽興再拜外命婦等皆

再拜訖司言前承令宣令云令旨夫人等同納景福
外命婦等又再拜尙食取爵奉進皇后舉酒樂作外
命婦等皆三稱萬歲皇后舉酒訖尙食受虛爵復於
坵樂止司贊曰再拜掌贊承傳外命婦等皆再拜司
賓引爲首者就席後立司贊曰就座掌贊承傳外命
婦等俱就座尙食進酒至階司贊曰酒至興掌贊承
傳外命婦等俱興立席後尙儀至階省酒尙食奉酒
進皇后舉酒樂作如常又行外命婦酒酒至司贊曰
再拜掌贊承傳外命婦等俱再拜受觶司贊曰就座
掌贊承傳外命婦等俱就座坐飲皇后舉酒訖尙食

受虛爵復於坵樂止觴行三周尚食進御食食升階
司贊曰食至興掌贊承傳外命婦等皆起立席後尚
儀至階省案尚食品嘗訖以次進置御前又行命婦
案

御若不食及命婦案先下訖不須興

設食訖司贊曰就座掌贊承傳

外命婦等皆就席坐皇后乃飯樂作外命婦等俱飯
御食畢樂止仍行酒遂設庶羞諸伎以次作若賜酒
司言前承令詣東階上西向稱賜酒階下掌贊承傳
外命婦等皆起再拜立受觶坐飲訖起立授虛觶又
再拜就席坐酒行十二徧會畢司贊曰可起掌贊承
傳外命婦等皆起立席後司賓引降各納舄樂作俱

引復階下位樂止其廊下者仍立於席後立定司贊
曰再拜掌贊承傳外命婦等在位者皆再拜若有束
帛則尙功帥其屬以束帛預立於東西廂司言前承
令降自西階詣命婦西北東面稱令旨外命婦等皆
再拜宣令訖外命婦等又再拜尙功帥其屬以次授
束帛訖外命婦等又再拜司賓引外命婦等以次出
樂作出門樂止內典引承引次出尙儀前奏禮畢還
侍位皇后降座樂作入自東房警蹕侍衛如來儀樂
止

大唐開元禮卷第九十八

大唐開元禮卷第九十九

嘉禮

皇帝於明堂讀孟春令

皇帝於明堂讀仲春令

皇帝於明堂讀季春令

皇帝於明堂讀孟春令

陳設讀令

鑾駕出宮鑾駕還宮

陳設

禮部尙書先讀令三日奏讀月令承以宣告 前三

日尙舍直長施大次於青龍門外道北南向尙舍奉御設御座守宮設文武侍臣次於大次之後文官在

左武官在右俱南向設羣官次於璧水東門之外文
官在北武官在南俱西上 前一日尙舍奉御設御
幄座於青陽左个近西東向守宮設三品以上及諸
司長官座於青陽堂上文官於御座東北南向武官
於御座東南北向俱重行西上

無長官者次官一設
人升判官不合

刑部郎中讀令座於御座東南北向有案設文官解
劍席於丑陞之左設武官解劍席於卯陞之右皆內
向太樂令展宮懸於青陽左个之庭設舉麾位於堂
上寅陞之南北向一位於樂懸東北南向典儀設三
品以上及應升座者位於懸東文左武右俱重行西

向相對爲首設非升座者位文官四品五品於懸北
六品以下於其東絕位俱南向武官四品五品於懸
南六品以下於其東當文官俱北向皆重行西上設
典儀位於懸之西北贊者二人在東差退俱南向奉
禮設門外位各於次前俱每等異位重行相向西上

鑾駕出宮

前出宮三日本司宣攝內外各供其職守宮設從駕
之官五品以上次於承天門外東西朝堂如常前
二日太樂令設宮懸之樂於殿庭如常儀其日未
明七刻搥一鼓爲一嚴

三嚴時節前一
日侍中奏裁

侍中奏開宮